

沅
湘
耆
舊
集

沅湘耆舊集卷第一百八十七

新化鄧顯鶴湘臯編輯

長沙毛國翰青垣校訂

郭六芳漱玉

五十二首

漱玉字六芳號瓊泉湘潭人雲麓明府汪燦女衡
山諸生羅亨鼎芝麓室有繡珠軒集湘潭郭氏一
門閨秀姑姪姊妹皆能詩六芳絕去藻繪時露風
骨到家詠古諸作尤得古樂府之趣非尋常閨閣
語可比芝麓亦才士久困諸生六芳日促其攻舉
子業榜發輒鞅鞅讀書薦書後詩意緒亦良苦也

到家

初六整行裝初七泊河側初八到湘潭水天共一色直從
兩湖西行過兩湖北黃犬臥當門吠我疑是客報道遠人
來笑語簾櫳隔女姪忽旋歸叔母似相識兄弟俱長大一
美風格相見敘離情燭光如晝白嬌癡四妹小鬟雲纔
覆額牽我薄羅衫索我舊詩冊久坐情愈親團坐屋隅仄
阿爺自外回顧女喜尤劇呼女問歸程來蹤可追憶初六
整行裝初七泊河側初八到湘潭水天共一色風塵果勞
苦艱難行不得阿爺聞之笑歸程但咫尺男兒仗劍遊立
功向沙蹟十年還故鄉兩鬢霜雪積我昔上長安到處鴻
留迹歸時楊柳青去時荷葉碧不知客路難卹知家居逸
女聞阿爺言自媿還自惜依依語深夜斜月照松柏

易貞女

誰言女有夫明明一弱女誰言女無夫十年字已許夫生女也幸夫死女也命致辭父母前一死兒已定阿母爲女言女計毋乃左禮經未廟見稱婦且不可况未入郎門休歌黃鵠句况未見郎面休學女貞樹女聞哀哀嚟兒死兒命正使兒可不死柰兒已受聘今日復明日奄奄粒竟絕心冷一寸灰舌噴一斗血在天有日月在地有冰雪易女生其閒千秋同皎潔

題閨賢畫冊

老萊妻投畀

貧賤古人重富貴古人輕今人慕富貴勞勞累一生不若

老萊妻投畚無世情

孟光舉案

鹽糲更布裙三日入庖廚此眞良鴻妻一笑偕隱吳誰言
富貴女嫁易輕其夫

少君挽車

夫賤妻求去夫貴妻跪迎鄙哉朱蘇婦母乃非人情不見
桓少君同挽鹿車行

唐氏乳姑

養姑姑無食乳姑姑無嫌黜黜妾心血請姑嘗苦甜翻笑
元紫芝乳姪難均霜

漂母飯信

幸遇淮陰侯酬母奉千金不然一飯耳名豈到如今男兒
幸自愛閨閣亦知心

將進酒

將進酒君莫辭今日不飲明日遲明日花較今日老今日
花非昨日好爲君滿酌琉璃卮勸君飲及少年時君不見
勞勞塵世多熱客口乾舌焦飲不得

行路難

行路難君知否前有鬼嘯後有虎吼出門一步卽天涯人
生何事輕分手長安米雖賤不如飯胡麻洛陽酒雖好不
如飲流霞君不見黃金揮盡無心腹夜半窮途有人哭

擬王仲初鏡聽辭

萬樹梅花冷飛雪晚粧纔罷愁眉結懷中寶鏡月一團清
光曾照人離別別時早將歸期訂郎歸不歸私卜鏡窻前
暗祝階前行無心好語有心聽聽來兩字平安好似慰安
心防妾惱歸房覽鏡滿心懽鏡若有靈鏡是寶明年郎歸
共郎話不須更卜橋頭卦曉起紗窗對鏡時倩郎細畫雙
蛾眉

春望

樓外春如許煙光碧四圍絮隨花亂落雲與鳥爭飛溪水
綠平岸夕陽紅映扉徘徊欲終日相賞竟忘歸

占劍

玉匣藏三尺年年抱不平光芒宵消散恩怨自分明賞識

多豪俠流傳失姓名雄心猶未減看取斫長鯨

古琴

當代知音少摩挲我欲愁高山與流水一曲已千秋老鶴
唳松樹閒雲來竹樓昨宵偶揮手餘韻尙悠悠

古硯

高臺築銅雀舊瓦半飄零空抱美人憾長畱騷客銘蟾光
終古白鵝眼至今青年代已磨滅墨花誰乞靈

寄懷諸妹

入檻晚風柔含情獨倚樓竹筵三徑月蟲撼一庭秋卿夢
鐙前語歸心江上舟雁聲聽不得寒露滿汀洲

外歸卽事

擬把寒衣寄君歸喜不禁關山前度夢刀尺昨宵心道我
病容減知君別思深滿斟一杯酒小坐話窗陰

春寒

圖消九九尙餘寒草屈金鉤露未乾滿院綠陰清晝永一
簾紅雨杏花殘游絲蕩蕩東風軟乳燕輕盈春意闌爲惜
韶光過已半畫樓盡日倚窗看

病起

開簾尙怯曉風侵蓬鬢梳來力不禁一種窗前生草碧多
時檻外落花深藥鑪茶熟新知味硯匣塵封久廢吟正是
暮春好時節黃鸝枝上度清音

送侄愉妹于歸長沙

蘭槩雙搖一葉舟。瓊閨話別意綢繆。家風勤儉同余守。性
格溫和不讓汝。優敢道詩詞真絕世。還期夫壻盡封侯。試看
江上梅花月。偏照吹簫紫鳳樓。

同外夜話

朔風凜凜夜。燈寒百事繁。心通歲闌家。累日多緣我拙名。
程天遠歎君難離愁。幾處憑誰寄別思。千重繞夢殘翹首。
白雲親舍在。晨昏頻爲祝加餐。

書夫子薦書後

已近蓬萊合流仙。誰知選佛又無緣。九還功鍊燒丹火半。
路風回渡海船。遇合總憑天作主。文章難與命爭權。糶樓
不見封侯信。孤負金釵當卜錢。

寄鳳氏姑

昨夢到江干，隔岸煙籠樹。風起波浪生，扁舟不可渡。

春山

雨後山添翠，雲開一徑斜。鳥鳴煙破處，芳樹雜生花。

題美人觀潮圖

渺渺潮頭水，悠悠客子舟。含情無一語，望斷碧雲頭。
潮來信有期，潮去一何急。潮水自來去，美人空佇立。

憶外

窗前月一團，莫照他鄉客。我是別離人，秋心拋未得。
漫說鄉關近，須知別路賒。相思不相見，咫尺卽天涯。

瀟湘八景

瀟湘夜雨

暝色入扁舟行人在何許帆開嶽麓雲衣帶瀟湘雨

洞庭秋月

不聽女嬃砧不鼓湘娥瑟人與丹俱圓天隨秋一色

平沙落雁

爲耽稻粱謀遠度關山月今夜宿平沙萬頃蘆花白

遠浦歸帆

遠水粲明霞斜陽澹新霽誰家一葉舟歸帆渺天際

煙寺晚鐘

古寺倚空青疏鐘度寒翠日暮西風生一聲天外墜

漁村夕照

人住蓼花村舟泊蘆花港夕陽滿柴關家家晒漁網

江天暮雪

江天入混茫雪水其清絕老漁坐船頭一竿釣寒雪

山市晴嵐

前山翠欲流小雨淨如拭彷彿茜紗窗蛾眉初畫出

恭送家大人北上

行途珍重記加餐雪滿關河二月寒一紙平安勤遠寄
兒早解憶長安

虞美人花

楚宮畱得一枝春
蠟燭興亡陌上塵
惟有美人情不盡
年年深鎖翠眉顰

梨花

梨花新綻短牆東一片香飄澹澹風
小婢不知春欲暮錯疑殘雪未消融

和南屏弟詠古

明妃

竟抱琵琶塞外行非關圖畫誤傾城
漢家議就和戎策已勝防邊十萬兵

飛燕

錦袍新賜受恩濃歌管聲傳紫禁中
可憶西清霜月夜有人團扇怨秋風

寄懷弟妹

沈湘者有集 卷第一百六十七
漫說湘雲抗手招昨宵歸夢去迢迢可知夜半乘涼月已
到家園第六橋

再詠明妃

問誰倡此和親議滿面胡沙掩朔風寄語君王休念妾而
今覺是畫圖中

論詩

玉溪懶祭非偏論長吉鬼才亦妙評儂愛湘江江水好有
波瀾處十分清

鴻纔印雪便畱迹絮不能飛爲染塵偶對菱花悟詩境分
明是我卻無人

今古才人一例看端莊流利並帶難桃花輕薄梅花冷占

盡春風是牡丹

喜外書至

瀟瀟風雨正愁予
欲寫紅箋寄鯉魚
忽接平安書一紙
省儉鐙下又修書

詠燕

海棠時節日初長
燕子重尋舊畫梁
柳外春風花外雨
雙來往補巢忙

柳枝詞

東風幾日畫初春
剪綠搓黃分外新
一樣蛾眉偏遜汝
曉粧妬殺鏡中人

湘江十里盪層藍
旖旎春光月正三
知爾曾經離別憾
怕

教人唱望江南

舟還長沙作

儂家家住兩湖東十二珠簾夕照紅今日忽從江上望始
知家在畫圖中

蒲帆十幅順風張閒煞篙工臥夕陽儂道不如風逆好一
回頭便見家鄉

郭笙愉潤玉 三十七首

潤玉字笙愉湘潭人適湘陰李石梧中丞星沅有
簪花閣詩集笙愉爲郭氏閨秀之雋旣歸石梧酬
贈益富石梧有梧笙館聯吟初集皆與夫人唱和
之作余爲題詩所云長日幽閑無個事一春詩課

是生涯者也年甫四十卒其子梅生杭奉其遺集
來謁爲編入斯集梅生年少有詩才其婦秉慧夫
人之姪亦才媛也後夫人十六日以毀卒尤可惋
云女土詩鈔云郭氏一門風雅湖南閨秀盛莫與
京者而其薰襲亦各有畦畛焉笙榆才思清婉
故依情發韻不尙刻鏤而亦不事譁囂微妙之言
時見名貴若夫遠則昔範以策選奇則英華方盛
未能擬其所底也

題峽山寺

台沓擁秋山微聞鐘磬響千古一松龕獨立雲峯上飛瀑
自縱鉚古木何蒼莽江渚月華明白鶴頻來往

暮秋寄懷

古木澹煙籠香飄小院中菊籬三徑月蟲韻五更風秋色

已云暮離懷誰與同
潮陽何處是千里寄詩筒

次韻和石梧花朝小酌

二分春色好畫檻雨痕消
風定蝶衣軟泥香燕語嬌
小桃紅亞樹細草綠平橋
共祝花生日題箋硯晚潮

春陰

半晴半雨日昏黃
幾度春陰鎖畫廊
倦繡人隨春共嬾捲
簾風與燕爭忙
人情祇解憐飛絮
天意分明護海棠
指點石闌瑤砌外
茸茸芳草暗池塘

雪花

一桁梨雲照影斜
東風昨夜冷窗紗
散來天女纖纖手
飛作春城處處花
嫩綠萼萼芳草迹
小紅微露海棠芽
水晶

簾捲凭闌望詠絮詩才記謝家

次韻和外舟次見寄

半載京華客思孤歸帆安穩度重湖浮名不過當場事知
已何愁異日無自有風雲騰劍氣不須耕饁問田夫竹陰
深處荷香淨好寫梧笙消夏圖

丙申試筆

春風著意透窗紗舉室團欒笑語譁椒席共斟邊地酒蘭
階早放隔年花流鶯款款聲初度粉蝶翩翩影又斜遙憶
使星千里外幾回翹首望天涯

九日寄外

長笛聲中一倚樓小園煙景不勝愁香生畫閣黃花澹雁

帶斜陽碧樹秋千里定知懷故苑萬山何處是辰州天涯
此日憑高望曾憶茱萸酒熟不

簡石梧

疏簾斜挂澹煙橫一榻琴書午夢清細雨又添芳草色初
晴如畫曉鶯聲銜杯鎮日長相伴繞郭名山不世情記取
蛾眉新月上曲欄同檢舊詩評

和外冬日寄懷卽次九日河源道中原韻

羊城十月無飛雪風景分明異故鄉只有鷓鴣嘯嶺樹更
無鴻雁度潮陽歸期早訂梅花放使事還操玉尺量盼到
綠窗重聚首屠蘇日爲歲除忙

次韻和石梧送春

楊花開遍柳絲絲。曾倚東風與護持。三徑落花知小別，一庭芳草廢相思。疏簾好月招同坐，遠樹斜陽下獨遲。幾度留春春不住，題箋莫笑阿儂癡。

舟發珠江

三年小住嶺南天，忍向仙湖醉別筵。千里帆飛風正好，一江波靜月初圓。青山笑我長爲客，綠樹依人欲上船。盼到故園梅放日，錦袍雙舞畫堂前。

梅影

一鉤新月破黃昏，翠羽翩翩恰到門。喚起梨花同一夢，綠雲滿地了無痕。

冰壺

朔風吹送雪漫漫幾日紅闌怯倚闌貯得玉壺冰一片遙
知天下已深寒

偶成

風搖翠竹影參差低拂南窗暑不知小榻夢回人意澹一
簾花氣一篇詩

月夜對芙蓉小酌

珠簾捲處小徘徊窗外花迎窗內開明月似憐顏色好夜
深扶近玉人來

小立

一庭風細露涓涓燭影衣香似去年小立闌干倍惆悵忍
看秋月十分圓

冬夜

迢迢風雪路三千回首離觴已一年
只有多情窗上月照人清夢過東川

卽景

小小窗櫺萬綠遮湘簾初上影欹斜
愛他春色濃如許開出數枝紅杏花

題淵梅夫人遺集

蓬萊仙闕盼歸船擁髻空餘未了緣
一樣上清司玉冊可憐分手判人天

曾扶花影過粧樓羅袂娉婷怯素秋
生恐臨風化煙去六年前已爲君愁

七夕

閒階獨坐撲流螢銀漢娟娟玉露零無限淩清今夜月有
人私語拜雙星

計程應已到長安樹影縱橫客影單料得他鄉定回憶去
年今夕並肩看

襄陽道中

湘北湘南路渺茫柳隄深處是襄陽那堪今夕推蓬望一
樣雲山似故鄉

岳家口阻風

風雨淒清水拍隄故鄉南望暮雲低最憐繞膝嬌兒女不
解人愁只管曉

和淑儀

曾記江干判袂時
秋雲如絮雨如絲
於今遠隔三千里
可憶春閨共詠詩

東風習習雨纖纖
二月春光到鏡奩
花影半欄簾半捲
又添離緒上眉尖

題琇卿女士畫蝶

羨君綵筆寫芳菲
翠黛分明著紙飛
記否兒時花外撲
粉香和月上羅衣

荅淑儀妹

南窗睡起綠陰遮
一縷香風拂鬢斜
莫道近來鄉思減
可知閨夢不離家

暮春懷故園

昨宵小雨送輕寒一片春光拂畫欄
萬樹綠楊飛絮莫教頻上翠樓看

留春詞

三月韶光漸覺殘留春無計挽春難
楊花底事多情甚飛逐東風撲畫欄

紅雨霏微繡閣西那堪春去草萋萋
殷勤爲祝枝頭鳥含住殘花莫亂啼

題環碧園

千竿修竹綺窗前環碧軒開別有天
卻望綠陰濃作雨一樓翠雨破寒煙

玻璃四面影縱橫細草含香恰嫩晴一幅春山好圖畫花
藏樓閣柳藏鶯

曲欄深處畫沈沈無數桃花開竹林閑立東風尋句久幾
忘珠露溼羅襟

玲瓏怪石聳煙巒萬絲搖空一鏡寒小立釣磯無箇事半
池春水試漁竿

春寒

春寒小閣玉釵斜簾幕沈沈正憶家一縷香生拋夢起不
知庭外有梅花

郭秉慧

十一首

秉慧字知珠湘潭人鄆縣知縣在璨女孫湘陰李

杭室年十八卒有紅薇館吟稿

對月

沈沈庭院棲鴉靜玉宇無塵蓮漏永湘簾半捲晚風來闌
干十二搖花影花影參差月影圓金爐香細雜茶煙微寒
漸覺羅衣薄露滴瑤階人未眠

陳家灣阻風

一帆出瀟湘忽忽百餘里無端阻石尤扁舟暫停止冥濛
遠岫雲浩渺重湖水添我別離情逢窗頻徙倚

過洞庭和梅生韻

湖水平如砥輕帆兩度游始知天地闊不盡古今愁遠樹
滄煙杳遙山夕照開推篷閒望處指點岳楊樓

舟中晚望

小坐推蓬望長江
圖畫開雲穿深樹出
帆帶夕陽來野燒
荒村外疏鐘曲岸隈
故鄉渺何處凝睇幾徘徊

舟次見月得前四句夢中續成

一綫蛾眉月清光客裏看
天高雲影薄江闊雁聲寒
乍覺風塵苦深知離別難
中宵耿不寐惆悵到更闌

舟行偶作

江淨碧漾漾扁舟泛夕曛
帆輕隨岸曲樹遠帶煙分
畫意寫春色鄉愁生暮雲
徘徊正無奈歸雁隔隄聞

訪梅

羅浮經歲無消息
畫閣生寒繡幰拈
試踏雪花頻遠徑爲

探春色幾巡檐誰家芳訊傳幽院何處清香入翠簾安得
一枝分庾嶺疏林低壓玉纖纖

聞櫂歌聲

一碧淨無煙江空月初吐何處櫂歌聲漁舟隔煙浦

卽景和梅生韻

兩岸春山圖畫開人家深住白雲隈碧紋蹴起一江水無
數寒鷗點雪來

春江風景認依稀綠遍長隄草正肥卻羨漁家自幽絕夕
陽紅處釣船歸

柳枝詞

春風二月鶯初妍生就蛾眉
剔可憐一種芳姿難畫處半

含殘日半含煙

沅湘耆舊集卷第一百八十七終

沅湘耆舊集卷第一百八十八

新化鄧顯鶴湘臯編輯

長沙毛國翰青垣校訂

方蓮漪曜二十四首

曜字德次號蓮漪桐城人上元車秋舫持謙室早
卒著有紅蠶閣詩稿道光戊戌余重遊金陵秋舫
出其遺稿并屬爲選入斯集其詩寓情幽潔孤韻
自標辭逸低徊時與古會亦名媛之選也秋舫祖
籍邵陽故蓮漪之詩得附焉

玉臺體二首

銀甲夜彈箏缸花豔豔生佯羞剗羅襪微醉捧金觥莫漫

拈紅豆相思無那情

儂住五湖邊郎來又幾年棗枝何纂纂蓮葉正田田貪就

郎嬌戲明知阿母憐

葉宮仙子司花曲

金雞一聲天下曉扶桑日射桃都小玉京有牒催花開九
華帳裏春魂繞聽說催花思不支攬衣推枕起遲遲自然
窈窕脂嫌汚別有風流粉罷施親來花底箋花譜翻新花
樣重添補挽動飈輪去似馳人間一夜羣芳吐天桃開罷
生丹胎疏密榮枯莫漫猜塵世儘供攀折去仙娥大費剪
裁來猛見花開又花落誰家庭院無鈴索用盡矜憐護惜
心披猖可柰封姨惡瑤臺高處傍眉霄看到春歸景寂寥

來年定注銀河水灌取花枝永不凋

四時閨詞仿西昆體

桃花吹墮東風香銀塘波暖圍鴛鴦瓊闥寂寂睡初起蟬
雲拖入青菱光篆痕一縷簾紋杳倦按星眸辨分秒隔宵
殘夢殢霞衾顰眉澹埽蛾兒小蠻箋巧樣界烏絲倚筠偷
譜迴文詞豔情欲說惱輕洩檀腮紅暈凝臙脂將雛燕子
愁清晝赤闌嬌鞞湘羅袖不分垂楊學楚腰招邀暗趁春
人鬪春

金蟬低色槐衙琴麟文汗漬香浸淫薰風送暑入山枕輕
羅稍轉靈犀簪乍眠不眠怯成寐軟紅催逼春魂碎蜻蜒
掉尾捉蝴蝶避人偷眼鞦韆背紉鉤碧裏苔痕鮮黏衣癡

說楊花顛玉籠鸚鵡厭煩熱脫條飛掠釵梁邊薄涼庭院
銀瓶澣無聲緩拭芙蓉絹恰趁流螢光並肩凝脂影逼蘭
襟豔夏

葉洲倒影銀河東美人紺碧拖殘虹雲和低撥不成曲夜
長清思騰蛟宮翠袖娟娟倚修竹小山亂踏黃金粟草草
和煙帖畫闌褰腰瘦改三春綠井梧葉墜遙天秋魚脂照
見流黃愁穿鍼樓角雁更寂雙星依約橫女牛商飈暗襲
欄褰弱飄蕩蛛絲罥珠箔露華如霰溼芭蕉虛擬刀環向
時約秋

珠宮昨夜裁冰綃紛紛市地成瓊瑤獸鑪無灰九華冷柔
黃畏縮鐙慵挑膽瓶緊裏梅花凍香入羅浮幻仙夢暫近

重簾理繡牀簾衣影暮晶屏縫丁冬檐馬驚魂摧披裘自
煖蒲桃杯頻年春色賺人憾靜對羯鼓無心催嚴寒不柰
金條脫守宮一滴猩紅活水竭蓮豔魂未溫衾窩只怪新
來闊冬

西城獅子窟展先慈墓

兒是掌中珍孃爲地下人荒山經歲至清酒及春陳風木
悲千古仙凡隔幾塵未償同穴願自注先君亦未葬涕淚溼羅巾

漫興索曉峯兄傳稱和

軒窗淨似揩亦足暢幽懷香影蝶當戶春深花滿街無方
催病去何處許愁埋卻怪垂楊柳低頭冒寶釵

次韻答愼之弟見寄

雲暗綠陰沈
蓬蓬春滿林
落花驚蝶夢
疏雨澹人心
閣微
簾櫳靜
琴荒爪甲深
兼旬成小別
誰與其幽尋

憑欄

春色年年在
春風處處忙
落花如我瘦
新竹傍人長
詩興
囚人減
童心逐
漸忘憑欄供
小佇
泛泛兩鴛鴦

晚春得句

又送春歸去
何時得再來
夢佳宜早醒
花好莫全開
我媿
題椒彥
誰矜詠絮才
多愁多病累
無語自驚猜

歸甯日示玉潯妹

荆花開處總
連枝
忽作人閒小
別離
三月不來驚
妹瘦
五年以長
媿
儂
癡常偕刺繡
心心印
學作儂湯事
事疑今日

筵前判共醉莫教分手說相思

元日

詠絮才疏學頌椒瞳瞳初日上窗寮
密花香趁新春早爆竹聲催舊臘
遙身瘦無心儲藥物家貧隨分度
昏朝屠蘇飲慣諸親量再拜庭前
獻一焦

題春風鬢影圖

自注代
子尊作

摩登神女好容光靜對蟬雲意自傷
此去只愁厮養賤再來虛負少年狂
是真好夢原難續未免春風太覺忙
尺五冰綃勞畫手有人夜夜熱心香

月夜憶子尊讀書南城山中

奔濤謾謾起松風想得秋山夜氣空
深澗有光星在下長

天無礙月當中羣生都向此時靜俗籟更從何處通讀徧
琅函人寢未滿半百八數方終

擬丹鳳城南秋夜長一首

丹鳳城南秋夜長一聲鴻雁滿天霜關山遠道縈閨夢刀
尺柔情攪客腸無可柰何邊月白誰能遣此塞塵黃劇憐
回首金堂燕猶自飛飛繞畫梁

自題畫蘭

如以文章論君原屈左徒遙憐空谷裏風雨不勝扶
卽事

絮薄怯秋寒
綠輕壓簾重
紅鐙悄無言
照我一樓夢
袖手

原無離別在天涯看到垂楊也憶家袖手迴廊春寂寂夕陽紅上海棠花

春晚

春風渺渺又天涯小立閒庭感歲華飛入湘簾雙燕子一銜柳絮一銜花

題汪璧雙夫

珥

梅花小幅

誰拈金管繪瓊仙渲染春情絕可憐擬向羅浮尋夢去三分明月二分煙

自題畫蘭雜記

美人隱隱隔平砵欲采蘼蕪意未降記得維舟湘岸住食聞花氣夜開窗

寒夜對月

十二橫窗了鳥聲迴廊風細撲簾旌夜深不捨溶溶月判
倚梅花坐到明

周季華絮

三十二首

絮字季華一字梳雪湘潭人同縣拔貢羅汝槐研
生室有吉劬閣詩若干卷詞一卷天啟宮詞一卷
雜文一卷季華爲石芳侍郎系英兒女簡堂學博
系詩之女生長名家濡染有素追歸研生倡和益
勤詩有風格屬興清遠寓情幽潔田家諸作尤不
似閨閣中語負才早卒研生哀之以其集屬選爲
采其尤者登焉

田家雜興

詩書舊德長力耕乃其本將圖枵腹充先期實倉廩南疇
播種餘瞻望勞引領茁茁稻苗繁習習和風靜螟螣出仍
藏世盛慙不逞春勞那復計秋成已微幸言烏先告歡彼
此有遺秉無須負米爲菽水遂定省

去年苦夏旱兼旬接秋陽赤霞燒地來草木皆焦黃高田
無顆粒低田亦半傷農夫一何苦匍匐求上蒼今歲幸逢
年積逋聊可償瘡痍未盡復何遽貪膏粱我心方憚暑顧
念猶惶惶

青松蔭高岡垂柳依平疇嘉樹雖無多蒼竹羅清幽涓涓
前溪水繞屋灣環流閒園偶矚眺盛夏如涼秋山鳥鳴夕

陽游鱗唼浮漚所得亦已厚無爲隆富求

結廬依山澤所貴清且閑藤蘿穿幽逕軒車無往還親戚
有時至雞黍霜可噉操刀同雜作僮婢忘癡頑既以起我
疲亦用恤彼艱阿翁年向髦終歲何時閒

薄暮俯山泉泉流清且澈飛禽棲乍定浮雲低可接好風
從西來霖雨應秋節兒童走相告滂沱足阡陌廣被及園
林餘聲激巖石須臾夕照開新沐遙山色

分耘向隴畝集課盈家墅夙秉性所同未可棄愚魯佔畢
有餘閒尋幽灌園圃盤飧多瓜蔬鮮鱗網深渚菜根有至
味三咽愜勿吐苟貪一時甘必致終身苦但得明一經終
勝饜肥豔家本無靈金修綆汲諸古

東家有健婦衣食寸心營日夕餉饁還纔車終夜聲虛堂
響蟋蟀達曙明寒鐙但求四體蔽甯復思奇溫不見朱樓
女羅綺隨時更

飄風昨夜來微雨溼茅屋田家多苦心隔夕盼晴地荷鋤
各三五怡怡相往復雞犬嬉道路牛羊雜山谷炊煙出林
微晚飯知已熟溪流濯足歸一飽此已足

和陶九日閒居韻寄仲姊次華

積陰如積愁旋開復旋生衆響夜雜作欲辨不可名中心
苦紛擾滌慮時一明相距亦匪遙不得常聞聲保身卽良
藥何必求延齡佳晨共風雨有酒還各傾泣露砌草淒
淒霜籬菊榮隨時貢嘉媚一一能娛情無爲迫人事坐廢新

詩成

集陶寄懷芋生子堅兩兄江南

貧居依稼穡歲功聊可觀青松冠巖列白雲宿簷端長吟
掩柴門虛室有餘閒良辰入奇懷綠酒開芳顏所業在田
桑弗獲辭此難耕織稱其用余襟良已殫榮華誠足貴守
拙歸園田達人解其會無復東西緣歲月不待人來會在
何年

次韻答子堅兄畱別之作卽送其北行

一聲爆竹換歲華閒庭局閉靜不譁皎皎東園老梅樹衝
寒競放枝頭花難逢驛使寄以北千枝照眼空紛絮阿兄
忽返自京洛車騎到戶隣人夸先人遺軌今尙在性格便

直平無頗

自注叔父司農公任吏部侍郎諫官時

丹

豪爽以平素鯁直四字

新詩一

編壓僂偶清譚四座獨煩苛自來吟弄涉淺俗茅塞頓啓
芟裁多臨行默然無一語素箋爲我書長調調長語重讀
未訖行塵一瞥何駁娖關河險巇慎顛躓丹息惡木趨喬
柯百年遙遙詎苦短及爾不死還來過國恩先世報不
盡相與努力珍春和

辛卯元日用禁體賦雪試筆

北窗幾日寒風烈隔年已作盈庭雪元晨曉望眩雙眸萬
里江天同一色竹枝低亞如揖人老梅倒壓千枝春寒禽
拳足入簷下但覺窗紙逾光明恍兮惚兮淨如拭妙手黃
筌寫不得形容刻劃誰最工惟應謝女才難敵華堂酒熟

方獻叔詩思栩栩從茲饒君不見朝陽微烘柳破凍生意
已茁青青條

嘉平二十二日立春

連朝飛滿千林雪閉戶圍爐正愁絕兒童報道倉鷓鳴聞
關一聲天下春迎新喜見青旂立飄颺掩映寒梅色翩翩
綵燕上釵頭冷氣漸逐條風收滿盤生菜盈盈綠恰值洞
庭新酒熟一杯酌向太歲前願花與人俱長年雲開照眼
微陽暄千山陳破春無邊

春雨

祇釀一春雨難祈三日晴厨荒登菜細砌滑履苔輕花落
朝無迹溪流夜有聲卻憐濃翠裏遷木帶呢鶯

望月

一片青霄月徘徊照小樓空庭同水淨斜漢見星流萬籟
靜於夜千山清似秋何來林外笛催動思悠悠
深夜臨階望詩懷寫不成竹敲風有韻荷點露無聲影向
金尊對光憐玉鏡盈遙知千里外皓魄一般明

秋夜偶成

鐙影澹青煙秋宵思悄然涼風侵樹早急雨到蕉先山果
初嘗栗寒衣漸疊絳停鍼愁夜永歆戶未成眠

歸北山居省親途中遇雨

行色帶晨霞旋風忽捲沙樹昏雲合幕村暗雨隨車玉灘
中田粒珠跳淺渚花前途尋小憩猶犬吠農家

始信風塵客常歌行路難冷甯尋菱著飢欲拾松餐倦羽
憂巢覆危途笑壁完尋常眠食穩未覺此身安

嘉平十二日立春同研生次東坡韻

不必東郊遠迎迓爐香惟向草堂熏春光先送一林雨寒
氣方凝三素雲浥浥清尊深夜泛紛紛雜霰靜中聞巡簷
擬索梅花笑已見窗櫺曙色分

自春徂秋未得歸省中秋對月率爾言懷

半年未有經過便愁倚良宵望月華就傳兒童勞酒饌居
貧歲月老桑麻空階花草迎秋長深夜衣裳怯露加莫向
庭前頻眺遠白雲濃處是天涯

采菊作寄研生

曉粧初罷啓重扉細摘秋英對碧暉爲愛冷香生夜枕別
教濃露溼朝衣風前轉覺枝逾勁月下應憐影漸稀時向
晴窗勤曝曬好畱芳澤待君歸

暮春雜興次研生元韻

三竿曉日射疏櫺坐愛晴光半掩扇蝶影在簾花寂寂蛙
聲入逕草青青相思憑寄詩成帙惜別生憎月滿庭惟有
侍兒愁太甚幾回鼾睡幾回醒

風前苦憶客衣單春意遲遲尙薄寒豈爲病餘慵攬鏡卻
憐花落更凭欄韶光已共楊枝老久雨難占鵲語歡賴有
當窗數竿竹閒愁消得幾回看

相約閒園玩物華江村處處足桑麻半山暮靄初成綺一

曲清溪稱浣紗雞鶩解食將熟麥兒童學種及秋瓜未須
秉燭謀長夜柘影葳蕤日未斜

小院長關白板扉春光默默思依依萍生淺水離還聚燕
逐斜風倦亦飛郊野一犁鳩雨足關山千里雁書稀遙知
偶抱維摩病不爲閒愁減帶圍

年華如電易經過春去堂堂牘幾何芳草一庭綠砌滿落
花萬點打窗多遙山漠漠看雲樹淺水盈盈長菱荷聽徹
聲聲喚歸急子規呢呢每雜田歌

幾樹松陰挂夕暉一欄香露欲沾衣花風有信蝶猶戀草
色無情人未歸燕翦卻看裁後錦鶯梭已聽纖殘機景光
豈便流連過料得傳經願不違

喜仲姊次華至

曉起當窗理鏡臺，應門忽報鈿車來。
貧家客至兒童喜，僻地聲喧鳥雀猜。
市遠幸留松晚摘，園荒猶贍菊新開。
天倫已覺歡無極，更有佳人共玉杯。

自注時偕客至

楊花

萬樹千條綠漸深，子規聲裏正清明。
已將弱縷縈春思，又遣花飛管別情。

旖旎垂絲拂苑牆，暫看初染澹鵝黃。
韶光眼底匆匆去，一夜東風雪滿塘。

尹蘭畚作芳

三十七首

作芳字蘭畚，湘潭人，衡州教授謝女，同縣諸生翁

錚室有吟香閣詩鈔

梅花

索笑倚前楹梅花處處橫
香生風一徑影浸月三更
畫愛雲林澹詩推摩詰清
更看瓊雪照玉骨瘦崢嶸

麥秋

隴上黃雲捲連天入望幽
風光剛首夏歲事儼新秋
天已三時賜人先萬頃收
兩歧還獻瑞率育被恩周

夏日山居

結宇三三徑幽居引興長
林深潛滌暑竹密早生涼
散步風亭外高吟水檻旁
荷花開正好酒泛碧筒香

中秋玩月

此夕當三五蟾光分外妍一年秋正半萬戶月同圓皎皎
銀河畔盈盈玉宇前桂香清撲鼻戀賞且遲眠

晚眺

繡罷渾無事殘陽屋角留江空天在水風峭客登樓一徑
閒雲繞千山古木稠回思湘岸柳煙雨正深秋

秋夜懷繼求書屋

兩載金齏署家園望渺然蓬蒿三徑地觴詠九秋天石塔
花飛雨湖隄柳帶煙幾回明月夜飛夢竹樓前

秋月

月色到庭隅清暉一徑紆天疑開玉宇人儼在冰壺雲影
看離卽秋聲聽有無賞吟須好句拈韻到紗幮

秋雨

聽雨坐高樓珠簾嬾上鉤
天邊新雁斷空際冷煙浮
淅淅驚殘夢蕭蕭動客愁
菊籬須好護佳色正清秋

秋煙

林臯日幾巡一徑晚煙屯
澹引樵薪客清延采菊人
小窗風乍定涼閣雨初勻
最愛溪潭叟朝朝把釣綸

寄呈家大人

省親曾有約何日東行裝
衣浣桃花水詩吟葛葉章
憾無雙羽翼飛不到衡陽
料得金釐署思兒倍感傷

七夕

東瓜呈出玉盤秋拜舞朱欄
望女牛四面雲收天似鏡
九

霄風定月如鉤金鉞渡遍三千界銀燭燒殘十二樓環珮
半空如有韻分明翠輦及時遊

夢醒

忽見窗前月朦朧透碧紗一枝風弄影多半是梅花

紅梅

獨施朱粉小林中掩映殘陽一色紅莫是師雄前度夢美人
沈醉立東風

春曉

珠簾不捲怯春寒曉起看花露未乾柳岸煙籠風細細鳥
聲曉處寺鐘殘

春草

湘南二月草芊絲
春雨湖隄碧似煙
滿地綠陰簾乍捲
東風人倚曲欄前

青門柳枝詞

煙輕日暖豔陽春
楊柳千絲一色新
糝徑全遮芳草碧
東郊忙殺踏青人

秦淮新漲水拖藍
旅邸愁聽笛弄三
行客一鞭殘照裏
馬蹶飛過畫橋南

春陰駒駛繫應難
拭目林臯花事殘
賸有長條猶旆旆
東風簾幙倚欄看

可憐春至又春歸
撩亂吹絲上客衣
試看參差雙翦燕
夕陽山外一情飛

試新茶二首

泉澆活水煮新茶蟹眼湯中雀舌芽記取岵嶠風味好月

團佳製出山家

自注時隨家大
人居衡郡官署

閒把茶經校晚春旗槍初試乳香新莫辭數碗雲芝飫自
喜詩腸淨絕塵

立秋

一夕涼生暑氣收井梧落葉報新秋白雲滿地天如水簾
捲西風月上樓

菊影

客來斗室酒杯殘捲上珠簾草閣寒最是有情如月姊閒
階佇立骨闌珊

三秋佳色畫難成
誰倩徐熙爲寫生
色色空渾莫辨倚
欄終是不分明

鐙下

小倦金鍼繡戶拋
開函重把舊詩鈔
清香縷縷茶煙篆
吟看梧桐月上梢

菜花

風柔雨細淨香塵
日督園丁灑溉頻
我更憐他花底鶯
家風味不嫌貧

新燕

去年相送返南天
秋雨瀟瀟秋草煙
寄語舊營巢尚在
衙泥不用掠花田

賣花聲

小樓昨夜雨連綿
杏苑紅看一色妍
捕架有人來紫陌
聲喚買午晴天

料得前來古渡濱
軟風斜日踏香塵
飭簫閒共花前吹
驚起垂楊拾翠人

春來我亦愛芳姿
夢醒閒闌日影遲
小玉喚來頻索買
斜簪春色上青絲

采茶詞

茶娘結伴採新茶
春日遲遲春雨斜
生計山家謀最切
筠籠攜過路三叉

笑指紅裙三兩家
春花緩緩碧油車
那知辛苦東風裏
踏

破鷺鞹石徑斜

桑翦

金翦風前素手持
兩鋒交處葉參差
年年翦盡江南綠
滿貯筠籃總是絲

桑梯

竹梯爭向碧雲支
斜傍牆頭低亞枝
穩步弓鞵空處立
年年辛苦暮春時

舟發衡州拜別家大人

帆隨湘轉水瀾漫
破涕何當強作歡
忍憶江干攜手別
不將老淚向兒彈

一念劬勞百憾侵
多慚作女負恩深
當年自矢終身孝
孤

負深閨不守心

夜起口占

殘鈿閃閃幾更天
歸夢依稀記不全
誰助一帆風八百
與飛渡嶽雲邊

阮湘耆舊集卷第一百八十八終